



D. O. M. M. M.

POSITIONES ANATOMICÆ

E T

CHIRURGICÆ.




UMANUM genus nondum dira satis impug-
bat malorum cohors, novas adhuc nec minus
inauditas nocendi vias, pulveris Pyrii, Tormen-
torum que Bellicorum inventionem, ipsi sua sus-
citavit male ingeniosa mens. Quot enim non
edidere strages sæva hæc instrumenta ! Quot
inde mala pullulavere ! Quam ardua, Quam que ampla labori-
bus nostris materies !

CUM verò illis vulneribus obnoxia jaceant omnes corporis
partes, cum que in illis curandis nihil, nisi Anatomia duce,
tentari queat ; idcirco Chirurgum fugere non debent omnium
partium figura, situs, connexiones, actiones & usus ; ideoque
de illarum structurâ difficultates propositas, pro viribus solvere
conabimur.

VULNERUM sclopetariorum indolem cognitu difficilem
judicant periti rerum aestimatores ; interim eam ad collisa refe-
rendam esse asserunt. Colliduntur quidem & atteruntur partes ;
nec comburuntur. Falsam hanc opinionem olim jam debellavit
Paræus, huic que ferè omnes nunc assentiuntur.

Ex vulneribus sclopeto inflictis nulla vel saltem pauca se-



quitur sanguinis profusio, nisi fortè vena major aut arteria lacerata fuerint, & etiam quandoquè in hoc casu non effluit cruor.

GLANDES è sclopetis emissæ membrum sæpè trajiciunt, nullo remanente corpore extraneo; quædam corpora nonnunquam cum glandibus in partes intruduntur, & in illis hærent, ut vestium frustula & alia, quanquam glandes exitum sibi faciant; deniquè glandes ipsæ nonnunquam in partes non transfixas infiguntur. Quæ vulnera leviora aut graviora pro partibus læsis, & instrumenti lædentis naturâ.

ILLA vulnera plurima comitatur accidentium series; in ipso instanti vulneratæ partis hebetatio cum frigoris quodam sensu, nullus vel obtusus dolor, syncope, nervorum distentio; Paulò post insurgunt intumescencia, inflammatio, Febris, dolores acutissimi, abscessus, ingurgitatio, gangræna, si funestis illis malis non occurratur.

PRÆTEREA magni momenti nobis videtur annotare partes collisas commoveri, sæpè quæ à læsione nervorum strangulari; ex quibus stupor inducitur, partium actio debilitatur, suffocatur quandoquè; unde gangrænæ plerùmque causa. Ad hæc referendæ sunt venenatæ illorum vulnerum qualitates ab antiquis decantatæ.

CIRCA curationem valdè diversa est auctorum sententia. Sua cuique ætati fuit opinio; sed præ cæteris illa vulnera amplianda, & suppurationem promovendam censemus.

AMPLIATUM vulnus explorandum; educenda extranea, si quæ sint, nisi profundius immergantur, aut arteriarum viciniam occupent; nec remediis suppurantibus hoc opus committendum.

SI vulnus membrum trajiciat, tunc intrâ vulneris oras lin-teolum cæsitium seu setaceum utile probatur.

IN primis deligationibus, nisi adsit putredinis timor, aquæ-vitæ usum noxium putamus.

SI contusa sit ossium substantia, & eorum superficies longè denudetur, amoris tegumentis, adhibenda præ cæteris Bel-lostii methodus.

3

GLANDES in eorum substantiâ infixæ terebratione in vicinis celebratâ eleventur & ejciantur.

Ossa fracta, assulis illicò solutis & ablatis, in statu naturali, quantum fieri potest, reponantur. * Quæ si cautè tractet Chirurgus artis suæ peritiâ vitam, membris incolumibus, plurimis restituet.

Si ossa aut articuli diffingantur & atterantur, in amputationis morâ periculum.

Quibus caput percutitur, his fit vulgò vel commotio, vel fractura; in his-ce fracturis plerùmque vicina ossis percussis, plerùmque lamella tantùm vitrea, resistente externâ ut vidimus franguntur, & frequentiore terebrationem suademus.

Grave periculum habent vulnera quæ Thoracem aut Abdomen penetraverunt, propter effusionis, & gangrænæ timorem. Plurimos tamen sanatos fuisse constat experientiâ, præcipuè si effusis materiis naturâ aut arte exitus concilietur.

Vulnera Tormentorum Bellicorum globis aut Bombæ fragmentis inflicta semper gravia, sæpissimè lethalia, non solum propter partium attritionem, sed & propter commotionem quam partes attritæ & vicinæ, plerùmque etiam totum corpus patiuntur.

TANTA vi, tantâ que pernecitate feruntur globi è tormentis emissi, ut aliquandò, licet partem non attingant, totam solidorum subjacentem texturam vehementer commotam, illæsa ut plurimum cute, destruant. In ejusmodi vulneratis Ecchymosis tantùm apparet cum fluctuatione quâdam, cutis tenax & indurata difficilè secatur, tumor aperitur, & mox effluit liquor vini turbidi facies repræsentans, carnes ita attritæ sunt, ut vix appareat earum vestigium, & ossa periosteio ipso denudata, imò fracta aliquandò conspiciuntur. Tumor autem ille statim aperiendus, alioquin immineret gangræna.

* M. de la Faye Pro-Demonstrator Regius, & è Reg. Chirur. Academiâ, Machinam invenit per utilem, cujus ope artuum ossa in statu reposita, firmiter ita retinentur, ut æger è loco in locum possit deferri. Quod in exercitiis plurima affert commoda.

TENTANDA, Necrosi non urgentē, resolutio, ad quam potissimum conferunt larga sanguinis missio, fomenta penetrantia, & resolventia inter quæ præstò sunt sal ammoniacum aqua vitæ solutum, & præsertim aqua communis sale marino satiata; hujus præstantissimum effectum testari possunt qui castra nobiscum sunt secuti.

EXPERIENTIA constat gravissima ex commotione oriri mala, & in duobus vulneribus ejusdem naturæ, & eidem parti inflictis non idem eventus, & ratione commotionis cujus quantitas determinari non potest, & ratione systematis nervosi in variis hominibus diversæ indolis. Unde quibus membra à gravi commotione stupefacta ingurgitantur, his raro profunt incisiones.

CUR cæteris paribus illi sanentur, dum hi gravioribus obruti accidentibus moriantur, non mirum. Ex argumentis alatis in promptu causa est.

Has positiones, DEO JUVANTE, & Præside M. PRUDENTIO HEVIN Artium & Chirurgiæ Magistro, Serenissimæ Delphinæ Chirurgo Primario, Demonstratore Regio, Academiæ Stocholmiensis & Lugdunensis Socio, tueri conabitur T U S S A N U S
DE BORDENAVE Parisinus, in almâ universitate Parisiensi Artium liberalium Magister.

P A R I S I I S,

IN REGIIS CHIRURGORUM SCHOLIS.

Die Jovis ij Julii à sesquisecondâ post meridiem ad septimam. Anno Domini 1750.

PRO ACTU PUBLICO.

Typis DELAGUETTE Regiæ Chirurg. Academiæ
 Typographi 1750.